

**I. ATALA****BIZKAIKO LURRALDE HISTORIKOKO FORU ADMINISTRAZIOA****Bizkaiko Foru Aldundia****Gizarte Ekintza Saila**

Bizkaiko Foru Aldundiaren abenduaren 19ko 140/2024 FORU DEKRETUA, Bizkaiko adinekoen elkarten programak egiteko Gizarte Ekintza Sailaren 2025. urterako dirulaguntzen deialdi publikoa eta oinarri arautzaileak onesten dituen.

Bizkaiko Foru Aldundiak, bere eskumenen eremuan eta Gizarte Ekintza Sailaren bitartez, era askotako dirulaguntzak ezartzen ditu urtero gizarte-zerbitzuak ematen dituzten irabazi-asmorik gabeko entitate pribatuentzat eta entitate lokalentzat; horretarako, beharrezko diren diru-kopuruak izendatzen ditu Bizkaiko Lurralde Historikoko aurrekontu orokorretan, eta dirulaguntzen deialdi publikoak onartzen ditu foru-dekretuen bidez.

Horrela, Foru Administrazioak ematen dituen dirulaguntzen araubide juridiko orokorra ezartzen duen 2005eko maiatzaren 31ko 5/2005 Foru Arauan ezarritakoa betetzen da. Izan ere, arau horren arabera, laguntzak eta dirulaguntzak emateko, publikotasunaren, gardentasunaren, lehiakortasunaren, objektibotasunaren, berdintasunaren eta diskriminaziorik ezaren printzipioak bete behar dira, bai eta, administrazio emaileak ezarritako helburuak betetzeari dagokionez, eraginkortasunarena eta, baliabide publikoak esleitu eta erabiltzeari dagokionez, efizientziaren printzipioa ere. Gainera, dirulaguntzak eman baino lehen, oinarri arautzaileak ezartzen dituzten arauak onetsi behar dira.

Foru-dekretu honek betetzen ditu erregulazio onaren printzipioak, zeinak Administrazio Publikoen Administrazio Prozedura Erkidearen urriaren 1eko 39/2015 Legean aurrez ikusten diren.

Foru-dekretu honetan, kontuan hartu da zer jarraibide bete behar den generoaren arabera inpaktuaren aurretiazko ebaluazioa egiteko, oinarritzat harturik zer ezartzen duen 2023ko martxoaren 16ko 1/2023 Legegintzako Dekretuak, zeinaren bidez onesten baita emakumeen eta gizonen berdintasunerako eta emakumeen aurkako indarkeria matxistarik gabe bizitzeko Legearen testu batagina. Horrez gainera, foru-dekretuaren tramitazioan, genero-inpaktuaren aurretiazko ebaluazioari buruzko txostena jaso da, zeina aipatzen baitu, bere 2. artikuluan, honako dekretu honek: Bizkaiko Foru Aldundiaren 141/2013 Foru Dekretua, azaroaren 19koa, Emakumeen eta Gizonen Berdintasunerako otsailaren 18ko 4/2005 Legean ezarritako generoaren arabera eraginaren aurretiazko ebaluazioa egiteko jarraibideak jasotzen dituzten gidalerroak finkatzen dituen.

Ebazpen hau prestatzeko orduan, kontuan hartu da zer xedatzen duen maiatzaren 28ko 63/2019 Foru Dekretuak, zeinaren bidez ezartzen baitira Bizkaiko Foru Aldundiaren jardun-eremuan hizkuntza ofizialak erabiltzeko irizpideak.

Orobat hartu da kontuan zer ezartzen den 2021eko ekainaren 15eko 87/2021 Foru Dekretuan, haren bitartez arautzen baita Bizkaiko Foru Aldundian izaera orokorreko xedapenak egiteko prozedura.

Jarduera-ildo horretan, Bizkaiko adinekoen elkarten programak egiteko dirulaguntzen oinarri arautzaileak eta deialdi publikoa onesten dira foru-dekretu honen bitartez.

Euskal Autonomia Erkidego Osorako Erakundeen eta Lurralde Historikoetako Foru Erakundeen arteko Harremanei buruzko azaroaren 25eko 27/1983 Legearen 7. c.1 artikulua ezartzen du lurralde historikoei dagokiela, nori bere lurraldearen barruan, gizarte-laguntzaren arloan legeria betearaztea. Nolanahi ere, Euskal Autonomia Erkidegoko erakunde erkideek ere zuzenean jardun dezakete arlo horretan, eta eskumen hori halaber aitortzen da Gizarte Zerbitzuei buruzko 2008ko abenduaren 5eko 12/2008 Legean. Foru-dekretu hau honako arau-dekretu hauetan ezarritakoaren babesean ematen da: 3/1987 Foru Araua, otsailaren 13koa, Bizkaiko Kondaira Lurraldeko Foru Erakundeen Hautapen, Antolaketa, Erregimen eta Funtzionamenduari buruzkoa, eta 135/2022 Foru Dekretua, azaroaren 22koa, Bizkaiko Foru Aldundiko Gizarte Ekintza Sailaren Erregelamendu Organikoa onartzen duena.



Horrenbestez, Gizarte Ekintza Saileko foru-diputatuaren ekimenez, eta Bizkaiko Foru Aldundiko Gobernu Kontseiluak 2024ko abenduaren 19an egindako bileran eztabaidatu eta onetsi ondoren, honako hau

XEDATZEN DUT:

Artikulu bakarra. — Oinarri arautzaileak eta deialdia onestea

Bizkaiko adinekoen elkarten programak egiteko dirulaguntzen oinarri arautzaileak onestea; hauxe da oinarri arautzaile horien testua:

XEDAPEN GEHIGARRIAK

Lehenengo Xedapen Gehigarria. — Aurrekontuko partida

Bizkaiko adinekoen elkarten programak egiteko dirulaguntzak aurrekontuko partida honen kargura ordainduko dira: Saila (03), Organikoa (0304), Programa (231109), Ekonomikoa (45100), PEP (2007/0598), 2025eko ekitaldiko aurrekontua; partida horren diru-izendapena gehienez ere laurehun eta laurogeita hamazortzi mila ehun eta berrogeita hamar (498.150,00) euro izango da.

Bigarren Xedapen Gehigarria. — Dirulaguntzak eteteko baldintza

Dekretu honetan arautzen diren dirulaguntzak eman ahal izateko, kreditu nahikoa eta egokia egon beharko da, dagokion ekitaldian, dekretutik eratortzen diren betebeharrak finantzatzeko, hala izan behar duela xedatzen baitu Aurrekontuei buruzko 2006ko abenduaren 29ko 5/2006 Foru Arauaren testu bategina onartzen duen 2013ko abenduaren 3ko 5/2013 Foru Dekretu Arauemailearen 56,3 artikulua.

AMAIERAKO XEDAPENAK

Amaierako Lehen Xedapena. — Arauak emateko gaikuntza

Ahalmena ematen zaio Gizarte Ekintza Saileko foru-diputatuari, dagozkion xedapenak emanik, foru-dekretu honetan xedatutakoa garatu, betearazi eta ezar dezan.

Amaierako Bigarren Xedapena. — Indarrean jartzea

Foru-dekretu hau 2025eko urtarrilaren 20an jarriko da indarrean.

Bilbon, 2024ko abenduaren 19an.

Gizarte Ekintzako foru diputatua,
AMAIA ANTUXUSTEGI ZIARDA

Ahaldun Nagusia,
ELIXABETE ETXANOBE LANDAJUELA

**BIZKAIKO ADINEKOEN ELKARTEEN PROGRAMAK EGITEKO
DIRULAGUNTZEN DEIALDIRAKO OINARRI ARAUTZAILEAK****1. artikulua. — Xedea**

1. Foru-dekretu honen bidez, onartzen da deialdi publikoa egitea eta oinarri arautzaile batzuk onartzea, Bizkaiko Foru Aldundiak dirulaguntzak eman ditzan, 2025eko aurrekontu-ekitaldian zehar, adinekoen elkarten programak egiteko.

2. Dirulaguntzok emateko, publikotasunaren, gardentasunaren, lehiakortasunaren, objektibotasunaren, berdintasunaren eta diskriminaziorik ezaren printzipioak beteko dira. Edozelan ere, laguntzok bereziak direnez, Bizkaiko Lurralde Historikoan era horretako erakunde asko dagoenez eta erakunde horiek zahartze aktibo horren barruan egiten duten lanak duen interes soziala aintzat hartuta, lehia-konkurrentziako prozedura erabiliko da, eta hainbanaketa sistemaren bidez emango dira, adinekoen elkarteetako bakoitzak lortutako puntuen arabera, proportzionalki.

2. artikulua. — Dirulaguntza jaso dezaketen programak

1. Dirulaguntza hauek 2025. urtean Bizkaiko adinekoen elkarten programak egiteko izango dira, betiere lauki honetan ageri den sailkapenaren arabera:

0542 kodea — Kultur jardueren eta garapen pertsonaleko jardueren programa

Helburua izango da gaitasun fisikoak eta intelektualak ahalik eta ondoen mantentzea, eta beste trebetasun batzuk eskuratzen laguntzea, parte-hartzaileak etorkizuneko egoeretara hobeto egokitu daitezen beharrezko direnak. Programa hau dela-eta diruz lagundu daitezkeen jarduerak 1. eranskinean jasotakoak dira.

0543 kodea — Jolas jardueren programa

Barnean hartuko ditu aisialdiko denbora betetzea helburu nagusitzat duten jarduerak, giro ludiko lasai batean parekotasun harremanak sustatzen dituztenak, horrela bizirik mantentzeko parte-hartzaileen harreman-ahalmena. Programa hau dela-eta diruz lagundu daitezkeen jarduerak 1. eranskinean jasotakoak dira.

545 kodea — Jarduera solidario eta komunitarioen programa

Helburua nagusia da adinekoen bizi-kalitatea hobetzea; barnean hartzen ditu elkartearen jarduera-eremuko beharrizan komunitarioei erantzutera bideratutako ekintzak. Barnean hartzen dituen jarduerak komunitatearen onerako edo mendetasun-egoeran nahiz gizartean desabantaila-egoeran dauden kolektibo zehatzen onerako izango dira, eta ezin izango da ahaztu haien helburua: adinekoak agerian jartzea, agerian jartzea zer ekarpen egiten dioten gizarteari, zer beharrizan dituzten eta aldarrikatzea zer eskubide dituzten adinekoek. Programa hau dela-eta diruz lagundu daitezkeen jarduerak 1. eranskinean jasotakoak dira.

2. Programatzat joko da mota bereko nahiz ezberdinekoak diren jarduera edo ekintza multzoa, baldin eta denbora tarte jakin batean antolatzen badira eta helburu nagusi bat lortzeko edo, kasuan-kasuan, helburu edo xede jakin batzuk lortzeko antolatzen badira.

Eta jarduerak, berriz, hau izango dira: elkarte batek bere kide guztiei irekita taldean baturik egiten dituen ekintzak, betiere helburuak eta helburu horiek lortzeko metodo bat baldin baditu eta elkarteak zuzenean antolatu, zuzendu eta kudeatzen baditu jarduerak.

Elkartearen jarduerak berdin izan daitezke aurrez aurreko egitekoak nahiz bertualki egitekoak, elkarteari egokien iristen zaion plataformaren bitartez, baina beti izan beharko du gastua fakturen bitartez justifikatzeko modua.

Ez dago erakunde eskatzaile batek aurkezteko gehieneko jarduera edo proiektu kopururik.

3. Jardueren gutxieneko edukia honako antolaera honi egokitu behar zaio:

— Zein kode duen jarduera bere baitan hartzen duen programa.

— Zein jardueratarako eskatzen den dirulaguntza.



- Jardueraren deskripzioa.
- Jardueran zenbat parte-hartzaile diren guztira, zenbat gizon eta zenbat emakume izan diren berezita.
- Aurreikusten diren gastuen deskripzioa.

3. artikulua. — Erakunde onuradunak

Erakunde onuradun izan daitezke, eskaera behar bezala eginez gero:

1. Bizkaiko adinekoen elkarteak. Honako hauek daude sartuta kontzeptu horretan:
 - a) Erretiratuaren etxe, klub eta elkarteak.
 - b) Adinekoen aldeko jarduerak egin ohi dituzten 60 urtez gorako adinekoen elkarteak; gainera, elkarte horietako bazkideak 60 urtetik gorakoak izan behar dira. Baldintza horiek elkartearen estatutuen bidez egiaztatu beharko dira.
2. Elkarte horiek honako baldintza hauek bete beharko dituzte:
 - a) Irabazi-asmorik gabeko entitate pribatuak izatea, eta egoitza soziala izatea Bizkaiko Lurralde Historikoan.
 - b) Legez eratuta egotea.
 - c) Euren jarduera nagusia Bizkaiko Lurralde Historikoan egitea.
 - d) Egunean izatea bai zerga-betebeharrak, bai zuzenbide publikoko gainerakoak eta bai Gizarte Segurantzarekikoak, 2005eko maiatzaren 31ko 5/2005 Foru Arauaren 12.2 e) artikuluan arauturikoaren arabera. Eskabidea aurkezten denean, dirulaguntza ematen den unean, betebeharra aitortzen den unean eta ordainketa egiten denean, une horietan guztietan bete behar da baldintza hori, eta hala justifikatuko da espedientean, Ogasun eta Finantza Sailak erabakitzen duen moduan.
 - e) Eskabidea aurkezten denean, dirulaguntza ematen denean, ordaindu beharra aitortzen denean edo dirulaguntza ordaintzen denean, dirulaguntzaren erakunde onuradunak adierazitako betebeharrak betetzen ez baditu, hamar egun balioduneko epea emango zaio, agiri bidez frogatu dezan betebeharrak betetzen dituela, eta ohartaraziko zaio, hori egin ezik, eskatutako dirulaguntza ezetsi egingo dela edo, hala denean, dirulaguntza ezeztatu egingo dela.
 - f) Egitura eta gaitasun nahikoa izatea dirulaguntzaren helburua beteko dela bermatzeko.
 - g) Dirulaguntzetarako eskabideak aurkezteko epea amaitu baino lehen, inskribaturik egotea Bizkaiko Lurralde Historikoko Gizarte Zerbitzuen Foru Erregistroan, Bizkaiko Foru Aldundiaren martxoaren 26ko 62/2002 Foru Dekretuan ezarritakoaren arabera.
 - h) Foru-dekretu honetan eta maiatzaren 31ko 5/2005 Foru Arauan ezarritako beste edozein baldintza.
3. Dirulaguntza hauetatik kanpo utzi dira, beren-beregi, aurrezki-erakundeek menpe dauden erakundeak eta elkarten federazioak edo elkarteak, elkarteok dekretu honetan arautzen diren dirulaguntzen onuradun izan daitezkeenean.
4. Nortasunik gabeko pertsona fisiko edo juridikoen elkarteak, publiko edo pribatuak, badira, elkarte horiek ezin izango dira desegin harik eta maiatzaren 31ko 5/2005 Foru Arauaren 35. eta 39. artikuluan ezarritako preskripzio-epea igaro arte.
5. Ezingo dute parte hartu, ez eta onuradun izan ere, Emakumeen eta Gizonen Berdintasunerako ekainaren 20ko 4/2018 Foru Arauaren 42. artikuluan zerrendatutako inguruabarrak betetzen dituzten erakundeak. Hona zein diren inguruabarrok:
 - a) Zehapen irmoa jaso izatea administrazio, lan zein zigor arloan berdintasunerako eskubidea nahiz sexuagatiko diskriminaziorik ezerako eskubidea urratzeagatik.



- b) Emakumeen eta gizonen berdintasun printzipioaren aurkakoak diren xedeak edo helburuak izatea, eta berdin onarpen nahiz sarbide sistema, funtzionamendua, ibilbidea, jarduna, antolaketa edo estatutuak.
 - c) Ez betetzea hiru araudi hauetan ezarritako betebeharrak: 1/2023 Legegintzako Dekretua, martxoaren 16koa, Emakumeen eta Gizonen Berdintasunerako eta Emakumeen aurkako Indarkeria Matxistatik Gabeko Bizitzaren Legearen testu bategina onesten duena; Emakumeen eta Gizonen Berdintasun Eragingarrirako 2007ko martxoaren 22ko 3/2007 Lege Organikoa, edo Emakumeen eta Gizonen Berdintasunerako 2018ko ekainaren 20ko 4/2018 Foru Araua.
- Era berean, ezin izango dira diruz lagundu sexuagatik diskriminatzen duten jarduerak edo ekintzak.
- 6. Ezinbestekoa izango da baldintza horiek betetzea deialdiaren lehiaketan parte hartu ahal izateko. Baldintza horiek betetzen direla egiaztatzeko, eskabideak aztertutik, foru-dekretu honen 9. artikuluan adierazten den ebaluazio-batzordeak aurrebaluazio bat egingo du.

Baldintza horietako edozein betetzen ez bada, ezetsi egingo da dirulaguntza-eskaera.

4. artikulua. — Eskabideen aurkezpena eta epea

- 1. Entitatearen estatutuetan ezarritakoaren arabera erakundearen gobernu-organismoaren legezko ordezkari direnek egin behar dituzte dirulaguntza hauek jasotzeko eskabideak, edo, bestela, horretarako ahaldunduak direnek.
- 2. Eskabideak aurkezteko epea 2025eko urtarrilaren 20ko 00:00etan hasiko da eta 2025eko martxoaren 31ko 13:30ean amaitu.

Eskabideak epe barruan aurkezten ez badira, ez dira izapidetzeko onartuko.

- 3. Eskabideak aurkezteko, nahitaez bete beharko da eskabideak aurkezteko epea hastean Bizkaiko Foru Aldundiaren egoitza elektronikoa argitaratuta egongo den inprimakia. Egoitza elektronikoa aurkezten direnak bakarrik joko dira eskabide formalizatzen, hau da, adinekoen elkarreentzako dirulaguntzen deialdirako prozeduraren bidez aurkeztuak.

- 4. Eskabidea aurkeztuko duen pertsonak identifikazio eta sinadura elektronikoko sistema bat izan behar du.

- 5. Bizkaiko Foru Aldundiko Gizarte Ekintza Sailak bermatuko du laguntza ematen zaiela interesdunei bitarteko elektronikoa erabiltzeko orduan, aintzat harturik zer ezartzen duen bere 12. artikuluan Administrazio Publikoen Administrazio Prozedura Erkidearen 2015eko urriaren 1eko 39/2015 Legea.

- 6. Inprimakia ez bada behar bezala betetzen edo aurreko paragrafoan ezarritakoaren arabera eskaturiko agirieta bat falta bada, errekerimendua egingo zaio eskaera egin duen entitateari —2015eko urriaren bateko 39/2015 Legearen 68.1 artikuluan ezartzen den moduan— hamar eguneko epean falta zuzentzeko eta aurkeztu ez dituen nahitaezko dokumentuak eramateko. Horrekin batera, adieraziko zaio ezen, hala egin ezean, eskaeran atzera egindakotzat joko dela, horretarako ebazpena 39/2015 Lege beraren 21. artikuluan jasotako moduan eman ondoren.

5. artikulua. — Prozeduraren instrukzioa

- 1. Gizarte Ekintza Saileko Etxeko Arreta Zerbitzuko Laguntzak Kudeatzeko eta Hirugarren Sektorea Sustatzeko Atalak antolatu eta izapidetuko du prozedura. Bilboko Lersundi kaleko 14. zenbakian dago unitate administratibo hori.
- 2. Etxeko Arreta Zerbitzuak edo administrazio-unitate eskudunak eskabideak eta erantsitako dokumentazioa aztertuko ditu, eta egiaztatuko du betetzen direla deialdi honetan ezarritako betekizunak, bitarteko telematikoenetik, Bizkaiko Elkarreragingarritasun Nodoren bidez, administrazio publikoetatik jasotzen duen informazioaren arabera, betiere interesduna modu arrazoituan aukera horren kontra agertzen ez bada, Administrazio Publikoen Administrazio Prozedura Erkidearen 39/2015 Legearen 28. artikuluan ezarritakoarekin bat.



3. Arrazoi teknikoak direla-eta elkarreragingarritasuna ezinezkoa bada, izapideak egiteko beharrezkotzat jotzen diren datuak edo dokumentuak eskatu ahal izango zaizkio.

4. Beharrezkotzat jotzen den kasuetan, prozeduraren edozein unetan, instrukzioaz arduratzen den organoak behar dituen agiri osagarri guztiak eskatu ahal izango dizkio erakunde eskatzaileari; horrez gainera, eskabideak ebazteko egoki ikusten duen beste edozein baldintza edo tramite lehendik bete gabekoa gauzatzeko eskaria ere zuzen diezaioke. Horretarako, 2015eko urriaren 1eko 39/2015 Legearen 73. artikuluan xedatutakoaren arabera, hamar (10) egun balioduneko epea emango dio, jakinarazpena egin eta biharamunetik aurrera zenbatuta. Horrez gainera, beren-beregi adieraziko dio agindutakoa bete ezean izapiderako eskubidea galdu dutela joko dela. Hala ere, interesdunaren jarduketa onartuko da, eta legezko ondorioak izango ditu, baldin eta epea iragantzat jotzen den ebazpena jakinarazten den eguna baino lehen edo egun horren barruan gertatzen bada.

6. artikulua. — *Dirulaguntza jaso dezaketen gastuak*

1. Honako hauek jotzen dira diruz laguntzeko gastutzat:

- a) Elkartek berak antolatu, zuzendu eta kudeatzen dituen jarduerak eragindako gastuak.
- b) Jarduera egiteko beharrezko diren gastuak, bat datozenak jardueraren izaerarekin eta ohiko garapenarekin.
- c) Indarrean dagoen araudiaren arabera behar bezala justifikatzen direnak.
- d) Deialdiaren urtean zehar gauzatu beharko dira.
- e) Jarduera egiteko kontratatzen diren langileen gastuak. Hala ere, ezin dira langileen gastuetan sartu erakunde edo zentroen zuzendaritza batzordeetako edo kontseiluetako kide legez egindako jarduerak eragindako gastuak. Gastuok soilik sar daitezke baldin eta kide horrek lan-kontratua badu eta beharrezkoa eta nahikoa den titulazioak dirulaguntzaren xedeak berezko dituen jarduerak egiteko gaitzen badu.

542 eta 545 programetako edozein jardueratan, elikadura-gastuak soilik egozten bada, eta ez bada jotzen irakasleei edo hizlariari espezietan egindako ordainketatzat, jolas-jardueren programako jardueratzat joko dira.

Bulegoko materialari dagokionez, diruz lagundu daitekeen gastutzat hartu ahal izango da hiru programetan eragindako gastua (hau da, kultura-jardueren eta garapen pertsonaleko jardueren programan, jolas-jardueren programan eta jarduera solidario eta komunitarioen programan), baldin eta beharrezkoa bada eta proiektu nahiz jardueraren ohiko garapenari badagokio.

Txangoak, mendi-ibilaldiak eta ospakizunak honela bakarrik justifikatu ahal izango dira: garraio-gastuekin, menuekin edo hornidurarekin, sarrerekin eta gidekin.

2. Ez dira diruz laguntzeko moduko gastutzat hartuko edozein zergalditan jasotako dirulaguntzen itzulketak, ez eta atzeratutako edo zor diren gastuen ordainketak ere.

3. Ez dira diruz laguntzeko jardueratzat joko udalek, mankomunitateek eta gainerako entitate lokalek edo erakunde publiko zein pribatuak antolatu eta gestionatzen dituztenak.

4. Ez dira diruz laguntzeko moduko jardueratzat hartuko honako jarduera hauekin lotutako gastuak: podologia, ile-apainketa, tentsioa hartzea, janaria etxez etxe banatzea eta elkartekideentzako antzeko gainerako zerbitzuak, zozketak, elkartekideei emaniko loteriak eta opariak, saskiak edo janari-loteak ematea; horrez gainera, zuzendaritza-batzordeko kideei soilik zuzendutako jolas-jarduerak; ez eta emariak, dohaintzak, babesak eta dohainik emandako beste edozein ekarpen ekonomiko.

5. Ezin dira diruz lagundu higiezinak erosteko maileguen finantza-gastuak eta horien amortizazioa, ez eta zeharkako zergak ere, baldin eta zergok berreskuratu edo konpentsatu badaitezke.



6. Diruz laguntzeko gastuen kostua ezingo da inoiz izan merkatuko balioa baino handiagoa.

7. Dirulaguntza ezin izango da erabili elkartetik kanpoko beste erakundeek antolatutako jarduerak edo matrikulak ordaintzeko.

8. Lehiaketa eta txapelketetan, eskudirutako sarien gastua ez da justifikatuko.

9. Bateragarria da, batetik, foru-dekretu honetan arautzen diren dirulaguntzen xede diren jarduerak egitea eta, bestetik, helburu bera betetzeko beste administrazio edo erakunde publiko edo pribatuetatik (nazio mailakoak zein nazioarte mailakoak) dirulaguntza, laguntza, sarrera edo baliabideak jasotzea.

10. Foru-dekretu honen babesean emandako dirulaguntzen zenbatekoa ezin da inola ere izan diruz lagundutako jardueraren edo programaren kostua baino handiagoa, ez bera bakarrik ez eta beste administrazio edo erakunde publiko zein pribatu batzuek, naziokoek zein nazioartekoek, emandako beste dirulaguntza eta laguntzekin batera ere. Kostua gaindituz gero, itzuli egin beharko da dirulaguntza gainditzen duen kopurua.

7. artikulua. — Dirulaguntza emateko baremoak eta irizpideak

Dirulaguntzen eskabideek 100 puntu jasoko dituzte gehienez, honako irizpide honen arabera emanak:

Puntuak banatzeko baremoa, atal bakoitzaren arabera	Puntuak
A) Bazkide kopurua	
Banatzeko gehieneko kopurua	35
Bazkide kopurua:	
— 120 arte	20
— 121 eta 250 bitartean	25
— 251 eta 550 bitartean	30
— 551 eta gehiago	35
B) Jardueren programak	63
B)1. Kultur jardueren eta garapen pertsonalekoen programa (542 kodea)	
Banatzeko gehieneko puntu kopurua, banakapen honen arabera:	30
Partaide kopurua:	
— 60 arte	16
— 61 eta 130 bitartean	18
— 131 eta 200 bitartean	24
— 201 eta gehiago	30
B)2. Jolas-jardueren programa (543 kodea)	
Banatzeko gehieneko puntu kopurua, banakapen honen arabera:	17
Partaide kopurua:	
— 150 arte	8
— 151 eta 300 bitartean	10
— 301 eta 500 bitartean	13
— 501 eta gehiago	17



Puntuak banatzeko baremoa, atal bakoitzaren arabera	Puntuak
B)3. <i>Jarduera solidario eta komunitarioen programa (545 kodea)</i>	
Banatzeko gehieneko kopurua	16
Partaide kopurua (Gehieneko puntu kopurua: 11):	
— 6 partaide arte	3
— 7 eta 15 bitartean	6
— 16 eta 50 bitartean	10
— 51 eta gehiago	16
C) Kideren batek parte hartzea «Bizkaia adin guztientzako lurraldea» proiektuaren talde eragileren batean	2
Gehieneko Puntu Kopurua, Guztira	100

Baremoaren A puntuan, entitateko bazkide-kopuruagatik emandako puntuazioa 4 tartetan ezarrita dago.

Entitate eskatzailearen bazkidetzat hartuko dira 2024ko abenduaren 31n «Bazkideen Erregistro Liburuan» inskribatuta daudenak.

B puntuan, honela banatuko dira puntuak:

- B.1. Kultur jardueren eta garapen pertsonaleko jardueren programa (kodea: 0542).
- B.2. Jolas jardueren programa (kodea: 0543).
- B.3. Jarduera solidario eta komunitarioen programa (kodea: 0545).

Diruz lagundu daitekeen programako jarduera guztietan aurreikusitako parte-hartzearen arabera emango dira puntuak, haietariko bakoitzean 4 maila bereizita.

C puntuan, bi puntu gehiago emango zaizkie elkarteei beren eskabide guztian, baldin eta «Bizkaia adin guztientzako lurraldea» proiektuan parte hartze aktiboa duten kideak badituzte; zehazki, euren komunitate, udalerrri edo mankomunitateetako talde eragileetan.

Kasu horretan, dagokion toki-erakundeak egiaztatu beharko du parte-hartze hori.

8. artikulua. — Dirulaguntzaren zenbatekoa

Dirulaguntzaren zenbatekoa hainbanatu egingo da, lortutako puntuen eta programa bakoitzaren aurrekontuaren arabera, eta eskabide bakoitzari gutxienez mila (1.000) euro egokituko zaizkio.

Hortik ateratzen den zenbatekoak ezingo du inola ere gainditu eskaturikoa edo aurrekontuan ezarritakoa:

- a) Eskaturiko kopurua.
- b) Bost mila (5.000) euro.

9. artikulua. — Ebaluazio-batzordea

1. Ebaluazio-batzordea arduratuko da, kide anitzeko organo legez, eskaerak aztertuta, eta haien ebazpen-proposamenak prestatzeaz. Batzordea osatzean, Emakumeen eta Gizonen berdintasunerako ekainaren 20ko 4/2018 Foru Arauaren 44. artikuluan ezarritakoa bete behar da. Era berean, Bizkaiko Foru Aldundiaren maiatzaren 28ko 63/2019 Foru Dekretuaren hirugarren xedapen gehigarrian epaimahaien eta batzordeen osakeri buruz xedatutakoa beteko da. Foru-dekretu horren bidez, Bizkaiko Foru Aldundiaren, haren erakunde autonomoen eta foru-sektore publikoaren jardun-eremuan hizkuntza ofizialak erabiltzeko irizpideak ezartzen dira.

2. Ebaluazio-batzordeak kide hauek izango ditu:

- a) Batzordeburua:
 - Autonomia Pertsonala Sustatzeko zuzendari nagusia.



- b) Batzordekideak:
 - Autonomia Pertsonala Sustatzeko zuzendariordea.
 - Etxeko Arreta Zerbitzuko burua.
 - Laguntzak Kudeatzeko eta Hirugarren Sektorea Sustatzeko Ataleko burua.
- c) Idazkaria:
 - Adinekoen arloko dirulaguntzen urteko deialdia egiteko eskumena duen kudeaketa arloko edo ataleko arduradun teknikoa edo, bestela, hango teknikariak.

10. artikulua. — Ezeste-arrazoiak

Honako hauek izango dira dirulaguntza-eskaera ezesteko arrazoiak::

- a) Diruz laguntzeko eskatzen den dirulaguntzaren xedea ez etortzea bat dekretu honen 1. eta 2. artikuluetan ezarritakoarekin.
- b) Dirulaguntza eskatzen duen entitatea ez egotea inskribaturik Bizkaiko Lurralde Historikoko Gizarte Zerbitzuen Foru Erregistroan foru-dekretu honetan esaten den moduan eta eskabidea amaitzeko epea amaitu aurretik.
- c) Dirulaguntza eskatzen duen entitatea ez egotea egunean zerga-betebeharrei, zuzenbide publikoko gainerako betebeharrei eta Gizarte Segurantzakoei dago-kienez.
- d) Dirulaguntza eskatzen duen entitatea ez egokitzea ondo foru-dekretu honen 3. artikuluan ezartzen zaionari.
- e) Ez betetzea foru-dekretu honetan deialdi honetarako eskatutako edozein baldintza.

11. artikulua. — Ebazpena

1. Foru-dekretu honen 3.6 artikuluan aipatutako aurretiko ebaluazioa eginik, ebaluazio-batzordeak eskabideei buruzko azterketa, txostena eta proposamena egingo du; arloan eskumena duen atalak espedientearen instrukzioa amaitu, eta Gizarte Ekintza Saileko foru-diputatuak ebazpena emango du, eskatutako dirulaguntzak onetsi edo ezesteko.

Halere, eta ebazpenak Bizkaiko Aldizkari Ofizialean argitaratu aurretik, Adinekoen Kontseiluari haien berri emango zaio.

2. Gehienez, sei (6) hilabeteko epea egongo da ebazpena eman eta jakinarazteko, eskabideak aurkezteko epea amaitzen denetik aurrera. Epe horretan ebazpenik ematen ez bada, eskaera administrazio-isiltasunez ezetsizat joko da.

3. Ebazpen honek administrazio-bidea amaitzen du, eta, beronen aurka, erakunde interesdunak aukerako berraztertze-errekurtsoa aurkeztu ahal izango dio Bizkaiko Foru Aldundiko Gizarte Ekintza Saileko foru-diputatuari; horretarako, hilabeteko epea izango du, ebazpena jakinarazi eta biharamunetik aurrera, Administrazioarekiko Auzien Jurisdikzioa arautzen duen uztailaren 13ko 39/2015 Legeko 123. eta 124. artikuluen arabera. Bestela, zuzenean administrazioarekiko auzi-errekurtsoa aurkeztu ahal izango du Euskal Autonomia Erkidegoko Auzitegi Nagusiko Administrazioarekiko Auzien Salan; horretarako, bi hilabeteko epea izango du, ebazpena jakinarazten zaion egunaren biharamunetik hasita, Administrazioarekiko Auzien Jurisdikzioa arautzen duen uztailaren 13ko 29/1998 Legearen 25. eta 46. artikuluekin bat.

12. artikulua. — Ordainketa

1. Dirulaguntza ordaintzeko agindua bakarra eta aldeztu aurretikoa izango da, erakunde onuradunaren aldekoa; nolana ere, dirulaguntza emateko ebazpenean aurrez ikusi diren helburuetarako erabili behar da dirulaguntza osoa eta aurretik foru-dekretu honetan ezarritako baldintzak bete behar dira.

2. Dirulaguntza hauen xede diren erakundeak nolakoak diren kontuan hartuta, eta dirulaguntzen xede eta helburua eraginkorki betetzen laguntzeko, ez da bermerik eskatuko.

**13. artikulua.— Dirulaguntzak aldatzea eta gutxitzea**

1. Dirulaguntza emateko kontuan hartu diren baldintzetan aldaketarik gertatuz gero eta, edozein kasutan, beste administrazio batzuek edo nazioko zein nazioarteko bestelako erakunde publiko eta pribatuek emandako dirulaguntzaren bat lortuz gero, dirulaguntza emateko ebazpena aldatu ahal izango da, eta dirulaguntza deuseztatu edo laguntzaren zenbatekoa aldatu ahal izango da.

2. Diruz lagundutako programak egin direla frogatzeko ezarri ziren epeak igarota ez bada egiaztatu eta justifikatu programa guztiak aurrez ikusi bezala burutu direla, edo egin eta justifikatutako gastua hitzartutako gastua (alegia, deialdia ebazteko foru-aginduan ezarrikoa) baino txikiagoa bada (betiere, bi kasuetan, laguntzen helburua eta xedea betetzat ematen direlarik), dirulaguntzaren zenbatekoa birdoitu egingo da, benetan justifikatu eta/edo burututako kostuen arabera. Horretarako, proportzionaltasun irizpidea erabiliko da, dirulaguntza emateko ezarritako irizpide eta mugei dagokienez.

14. artikulua.— Betebeharrak

1. Entitate onuradunek betebeharrak hauek izango dituzte:
 - a) Dirulaguntza ematea funtsatzen duen jarduera edo jarduerak egitea, deialdi honetako oinarri, baldintza eta eskakizun formal eta materialen arabera, eta hori dela eta izendatu zaizkion funtsak ez erabiltzea laguntza ematea ekarri zuten xedeak ez diren beste batzuetan.

Erakunde onuradunaren betebeharrak pertsonala da diruz lagundutako programa egitea, eta hori ez egiteko salbuespen bakarrak oinarri arautzaile hauetan ezarritakoak izango dira, horretarako mugatzat jorik Foru Administrazioak ematen dituen dirulaguntzei buruzko araubide juridiko orokorra arautzen duen 2005eko maiatzaren 31ko 5/2005 Foru Arauaren 27. artikuluan finkatzen direnak.
 - b) Justifikatzea, foru-dekretu honen 15. artikuluan ezartzen den moduan, egin dela diruz lagundutako jarduera; justifikatzeko modua Dirulaguntzen Erregulamenduaren 57. artikuluan araututakoa izango da, hau da, «Justifikazio-kontua, gastu-frogagiriak aurkeztuta». Justifikazio horrek bi alderdi argituko ditu: batetik, gauzatu dela jarduerarako onartu zen kostu osoa, eta, bestetik, bete direla dirulaguntzarako eskabide-erria jaso ziren baldintzak (hain zuzen ere, laguntza ematea ekarri zutenak).
 - c) Gizarte Ekintza Sailari jakinaraztea helburu bererako dirulaguntzarik edo bestelako laguntzarik jaso bada nazioko edo nazioarteko beste edozein administrazio-tatik edo erakunde publikotatik.
 - d) Ekintza baten finantzaketan dirulaguntzaz gain norberaren funtsak edo beste dirulaguntza zein baliabide batzuk erabili badira, justifikazio-agirian jaso behar dira beste funts horien zenbatekoa, haien jatorria eta funtsok nola aplikatu diren diruz lagundutako jardueretan.
 - e) Gizarte Ekintza Sailak egingo dituen egiaztapen-jarduketan pean jartzea, eta, halaber, eman diren dirulaguntzen eta laguntzen arloan Ogasun eta Finantza Sailari dagokion finantza-kontrolaren eta Herri Kontuen Euskal Epaitegiaren fiskalizazio-prozeduren pean jartzea. Horrela, jasotako funtsen aplikazioaren frogagiriak gorde beharko ditu erakunde onuradunak, agiri elektronikoak barne, egiaztapen eta kontroleko jardueren xede izan daitezke eta.
 - f) Era berean, dirulaguntzak jasotzen dituzte erakundeek eskabidean adierazitako datuei buruzko edozein aldaketa edo inguruabarren berri eman beharko diote Gizarte Ekintza Sailari, baldin eta aldaketa edo inguruabar horrek dirulaguntza jasotzean edo dirulaguntzaren xedea den jardueran edo helburuan funtsezko eragina izan badezake.
 - g) Dirulaguntzak jasotzen dituzten erakundeek Foru Aldundiak ekonomikoki parte hartu duela adierazi beharko dute dirulaguntzaren xede diren jardueretan, hori seinale bidez behar bezala adieraziz.



- h) Diruz lagundutako jardueraren inguruko jendaurreko agerpen guztietan hizkuntza ofizial biak (euskara eta gaztelania) erabiltzea.
- i) Bi hizkuntza ofizialak erabiltzea liburuxka, kartel edo beste edozein euskarritan, herritarrei beren jardueraren berri emateko.
- j) Entitate onuradunak bete beharko du emakumeen eta gizonen berdintasunerako ekainaren 20ko 4/2018 Foru Arauaren 46. artikuluan aurreikusitakoa, salbu eta interes publikoko arrazoiek justifikatzen badute hala ez egitea (halakoan, justifikazio-txostena aurkeztu beharko du organo proposatzaileak).
- k) Ez erabiltzea hizkuntza eta irudi sexistarik sortzen diren agiri eta euskarrietan.
- l) Proiektuaren ekintza-esparru guztietan genero berdintasuna betetzen dela zaintzea.
- m) Diruz lagundutako jardueraren onuradunak sexuaren arabera bereiztea, eta, beharrezkoa bada, emaitzen analisia egin, eta emakume eta gizonen artean berdintasun handiagoa lortzeko hartu beharreko neurriak ere aztertzea.
- n) Era berean, datuak sexuaren arabera bereizi beharko dira pertsonen buruzko edozein estatistikatan; hori guztia Emakumezkoen eta Gizonetzkoen Berdintasunerako ekainaren 20ko 4/2018 Foru Arauaren 24. artikuluan babesean.
- ñ) Dirulaguntza hau dela-eta antolatzen diren zerbitzu, ekitaldi edo jarduera guztietan oztopo arkitektonikoak eta komunikaziorako oztopoak ezabatzen laguntzea.
- o) Erakunde onuradunak, hala badagokio, Bizkaiko Gardentasunari buruzko otsailaren 17ko 1/2016 Foru Arauaren II. tituluan jasotako publizitate aktiboaren eskakizunak bete beharko ditu.
- p) Bi araudi hauek betetzea: 2016/679 (EB) Erregelamendua (Datuak babesteko Erregelamendu Orokorra) eta 3/2018 Lege Organikoa (Datu Pertsonalak Babestekoa eta Eskubide Digitalak Bermatzekoa).

2. Gizarte Ekintza Sailak eskubidea izango du deialdian emandako dirulaguntzak eskaturiko helburuetara bideratzen direla ikuskatu eta kontrolatzeko, eta, beraz, egoki iruditzen zaizkion azterketa- eta kontrol-sistemak erabili ahal izango ditu. Horretarako, erakunde eskatzaile guztiak ikuskatu ahalko dira, baita dirulaguntzak eman aurretik ere, indarreko arautegia betetzen duten ala ez egiaztatzeko.

15. artikulua. — Justifikazioa

1. Foru Administrazioak ematen dituen dirulaguntzen araubide juridiko orokorra arautzen duen 2005eko maiatzaren 31ko 5/2005 Foru Arauko 28. artikuluan xedatutakoa betetzeko, erakunde onuradunek epe hau izango dute justifikazioa egiteko obligazioa betetzeko: 2026ko urtarrilaren 2ko 00:00etik hasi eta 2026ko maiatzaren 29ko 13:30era arte.

2. Betebehar hori betetzat jotzeko, derrigor aurkeztu beharko da, egoitza elektronikoan, dirulaguntzaren justifikazioko kontua.

Honako dokumentazio osagarri hau aurkeztu beharko da: erakundeak urtean zehar egindako jardueraren urteko memoria, barnean harturik zer dirulaguntza eman dieten beste entitate batzuek memorian jasoriko jarduerari.

Oro har, gastuak egiaztatzeko, fakturazio-betebeharrak arautzen dituen Bizkaiko Foru Aldundiaren urtarrilaren 22ko 4/2013 Foru Arauaren 6. artikuluan jasotako baldintzak betetzen dituzten fakturak erabili beharko dira.

Salbuespen modura, dirulaguntza adjudikatzen zaien entitateek emaniko ziurtagiriek balioko dute gastuak justifikatzeko, baldin eta gastu-kontzeptu bakoitza faktura erraztuen bidez edo arautegia betetzen duten beste frogagiri batzuen bidez egiaztatzen bada, haien zenbateko osoa adierazten bada, eta zenbatekoa guztira emandako dirulaguntzaren %5etik gorakoa ez bada.

Goraxeago 5.1 artikuluan aurreikusitakoaren arabera diruz lagundu daitezkeen pertsonal-gastuak justifikatzeko, derrigor aurkeztu beharko dira haien kontratuak, nominak eta Gizarte Segurantzaren Erregimen Orokorren kotizazio-buletinak (TC 1-2).



3. Erakundeek aurkezten duten justifikazioa ez bada eredu ofizialaren arabera edo ez bada osorik betetzen, edo harekin batera eskatzen diren dokumentuetakoren bat falta badu, dirulaguntza itzularazteko espedientea abiaraziko da, dekretu honetan aurrez ikusitako xedapenen arabera.

16. artikulua.—Erakunde onuradunak dirulaguntza bere borondatez itzultzea

Erakunde onuradunaren ekimenez dirulaguntzaren zati bat edo osoa itzultzeko, beharrezkoa izango da aurretik ordainketa-gutun egokia eskatzea, Dirulaguntzen Erregelamendua onartu zuen Bizkaiko Foru Aldundiaren 2010eko martxoaren 23ko 34/2010 Foru Dekretuaren 76. artikuluan ezarritakoaren arabera.

17. artikulua.—Itzultzea

1. Ondoren zerrendatzen diren kasuetan, dirulaguntza gisa jasotako kopuruak itzuli egin beharko dira, eta haiekin batera berandutze-interesak, dirulaguntza jaso zenetik itzultzea erabakitzen den egunera arte sorturikoak.

- a) Dirulaguntza lortzeko, bete beharreko baldintzak faltsutu edo laguntza jasotzea galaraziko luketen datuak ezkututzen direnean.
- b) Xedea, jarduera, proiektua edo dirulaguntza emateko funtsa den jokaera oso-osorik edo zati batean betetzen ez denean.
- c) Justifikazioaren betebeharra betetzen ez denean edo behar adinako justifikaziorik egiten ez denean, maiatzaren 31ko 5/2005 Foru Arauaren 28. artikuluan ezarritakoaren arabera.
- d) Foru-arau honen 12. artikuluko h) letran adierazitako zabalkunde-neurriak hartzeko betebeharra betetzen ez denean.
- e) Foru-dekretu honen 12. artikuluko e), f) eta g) letretan xedaturiko egiaztapen-eta finantza-kontroleko jardueri aurre egitean, aitzakiak jartzean, eragozpenak jartzean edo ezetza ematean, bai eta kontabilitateko nahiz erregistroko betebeharrak edo agiriak gordetzeko betebeharra ez betetzean, horrek guztiak honako hauek egiaztatzeko ezintasuna baldin badakar: ea jasotako funtsen erabilera egokia den, helburua lortu den, diruz lagundutako jardueren errealitatea eta erregulartasuna norainokoak diren, edota xede berbererako beste administrazio edo erakunde publiko nahiz pribaturen batek (naziokoa zein Europar Batasuneko edo nazioartekoa) emandako beste dirulaguntza, laguntza, sarrera edo baliabiderik egon den.
- f) Foru-administrazioak erakunde onuradunei ezarritako betebeharrak eta onuradunok dirulaguntza jasotzeagatik dituzten konpromisoak betetzen ez direnean, baldin eta horrek helburuak lortzeko, jarduera egiteko, proiektua burutzeko edo dirulaguntza ematean aintzat hartu den jokabidea hartzeko erari eragin badio edo harekin zerikusia badu.
- g) Foru-administrazioak erakunde onuradunei ezarritako betebeharrak baita onuradunok dirulaguntza jasotzeagatik bereganatzen dituzten konpromisoak ere, —aurreko idatz-zatian aipatutakoez bestelakoak— betetzen ez direnean, baldin eta horrek guztiak ondoko hauek egiaztatzeko ezintasuna badakar: jasotako funtsen erabilera egokia den, helburua lortu den, diruz lagundutako jardueren errealitatea eta erregulartasuna norainokoak diren, edota xede berbererako beste administrazio edo erakunde publiko nahiz pribaturen batek (naziokoa, Europar Batasuneko edo nazioartekoa) emandako beste dirulaguntza, laguntza, sarrera edo baliabiderik egon den.
- h) Europar Batasunaren Funtzionamenduari buruzko Itunaren 107. artikulutik 109. era bitartean xedatutakoa dela bide, berez dirulaguntza itzuli beharra dakarren erabakia hartzea.
- i) Dirulaguntzaren arau erregulatzaileretan xedatutako gainerako kasuetan.



2. Baldintzetako bat edo batzuk ez betetzeak edo epearen barruan jardueraren zati bat bakarrik egiteak (betiere, zalantza barik egiaztatzen bada onuradunak konpromisoak betetzeko asmoa duela) berekin ekarriko du laguntza itzuli behar izatea. Itzulketa hori kalkulatzeko, dirulaguntza emateko orduan kontuan hartutako baremo eta irizpideen arabera proportzionaltasun-irizpidea erabiliko da, dirulaguntza emateko ezarritako muga barruan.

3. Berandutze-interesak kalkulatzeko, dirulaguntza ordaintzen den unetik gastuaren justifikazioko kontua aurkezten den egunera arte zenbatuko da; betiere jarduera oso-osorik bete dela egiaztatzen bada edo, halakorik egiten ez bada, konpromisoak zailantzarik gabe erabat betetzeko jokabidea ikusten bada.

18. artikulua. — *Bateragarri edo bateraezin izatea xede bererako eskuraturiko beste dirulaguntza, laguntza, diru-sarrera edo baliabide batzuekin*

Dirulaguntza hauek bateragarriak dira erakunde onuradunak dirulaguntzaren xedea betetzeko jaso dezakeen beste edozein dirulaguntzarekin, foru-dekretu honetako 1. artikuluan ezarritakoan izan ezik.

Baina dirulaguntzen zenbatekoak benetako gastuen zenbatekoa gaindituko balu, itzulketa proportzionala egin beharko litzateke.

19. artikulua. — *Zehapen-araubidea*

Entitate onuradunak Foru Administrazioak emandako dirulaguntzen araubide juridiko orokorra arautzen duen maiatzaren 31ko 5/2005 Foru Arauaren IV. tituluan («Dirulaguntzei buruzko arau-hauste eta zehapen administratiboak») ezarrita dauden arau-haustee-tako bat egiten badu, zehapena ezarriko zaio, dagokion zehapen-espedientea izapidetu ondoren, honako araudi hauetan ezarritakoaren arabera: 39/2015 Legea, urriaren 1ekoa, Administrazio Publikoen Administrazio Prozedura Erkidearena; 40/2015 Legea, urriaren 1ekoa, Sektore Publikoaren Araubide Juridikoarena, eta 1/2023 Legea, martxoaren 16koa, Euskal Administrazio Publikoen zehatzeko ahalari buruzkoa.

20. artikulua. — *Jakinarazpen elektronikoa*

Entitateei egin beharreko jakinarazpenak bitarteko elektronikoen bidez egingo zaizkie, Administrazio Publikoen Prozedura Erkidearen 2015eko urriaren 1eko 39/2015 Legearen 40. artikuluan eta hurrengoetan ezartzen denarekin bat.

Bitarteko elektronikoen bidez egin beharreko jakinarazpenak Bizkaiko Foru Aldundia-ren Egoitza Elektronikoa agertuz egingo dira (www.ebizkaia.eus), Administrazio Elektronikoa buruzko 2015eko maiatzaren 5eko 62/2015 Foru Dekretuan xedatutakoaren arabera.

21. artikulua. — *Aplikatu beharreko araudia*

Foru-dekretu honetan arautzen diren dirulaguntzek, dekretuari berari jarraitzeaz gainera, beste hauei ere jarraitu behar diete: Foru Administrazioak ematen dituen dirulaguntzen araubide juridiko orokorra arautzen duen maiatzaren 31ko 5/2005 Foru Araua; 2010eko martxoaren 23ko 34/2010 Foru Dekretua, zeinaren bidez onartzen baita 5/2005 Foru Arau hori garatzen duen dirulaguntzen araubidea, eta aplikatzekoak diren gainerako arau guztiak.

Halaber, foru-dekretu honetan aurreikusi ez den guztirako, modu osagarrian aplikatzekoak izango dira Herri Administrazioen Administrazio Prozedura Erkidearen 2015eko urriaren 1eko 39/2015 Legearen arau orokorrak, bai eta arau horiekin bat datozen eta aplikatzekoak diren gainerako indarreko lege-xedapen guztiak ere.

**22. artikulua.—*Dirulaguntzen onuradun diren erakundeetako arduradunen datu pertsonalen tratamendua***

1. Datu pertsonalak honako bi araudi hauen arabera tratatuko dira: 2016/679 (EB) Erregelamendua, 2016ko apirilaren 27koa, datu pertsonalen tratamenduari dagokionez pertsona fisikoen babesari eta datu horien zirkulazio askeari buruzko arauak ezartzen dituen, batetik, eta, bestetik, 3/2018 Lege Organikoa, abenduaren 5ekoa, Datu Pertsonalak Babestekoa eta Eskubide Digitalak Bermatzekoa.

2. Tratamenduaren arduraduna Gizarte Ekintza Saileko Autonomia Pertsonala Sustatzeko Zuzendaritza Nagusia da (Ugaskobidea 3 bis, 48014 Bilbo), eta datuak babes-teko ordezkaria, berriz, Informazioaren Segurtasuna eta Datu Babesa Bideratzeko Atala (Kale Nagusia 2, 48001 Bilbo).

3. Tratamendu hori ahal publikoak baliatzeko eta legezko betebeharrak betetzeko egingo da, eskabidea sinaturik ematen den onespen espresua dela bide.

4. Datuak interesdunari edo haren ordezkariari eskatuko zaizkio, baita beste administrazio, erakunde, erregistro edo entitate publiko edo pribatu batzuei ere, legeak ezartzen dituen mugen barruan.

5. Lortutako datuak adinekoen autonomia pertsonala, gizarteratzea eta parte-hartzea bultzatzen duten jardueretarako ematen diren dirulaguntzak kudeatzeko erabiliko dira.

6. Ez da datu pertsonalik lagako, non eta ez dagoen horretarako betebeharrak legalik edo interesdunaren baimenik. Horrez gainera, ez da aurreikusten hirugarren herrialdeetara edo nazioarteko erakundeetara datu-transferentziarik egitea.

7. Interesdunak eskubidea du bere datuak eskuratzeko, zuzendu edo ezaba daitezela eskatzeko edota haien tratamendua mugatu edo aurkaratzeko, idazki bat bidaliz Informazioaren Segurtasuna eta Datu Babesa Bideratzeko Atalera.

8. Eskubide horietako bat baliatzeko aukera mugatu daiteke baldin bateraezina bada botere publikoen jardunarekin edo aplikagarria den araudiaren arabera legezko betebeharrak betetzearekin.

9. Datu pertsonalen tratamenduari buruzko informazio xeheagoa kontsulta dezakezu Bizkaiko Foru Aldundiaren egoitza elektronikoan, hartarako prozeduran.

23. artikulua.—*Diruz lagundutako jardueran parte hartzen duten pertsonen datu pertsonalen tratamendua*

1. Foru-dekretu honetan arautzen den dirulaguntzaren entitate onuraduna, bera izango da diruz lagundutako jardueratik eratorritako datu pertsonalen tratamenduen erantzule bakarra. Bereziki, nahitaez bete beharko ditu bi araudi hauetatik etor litezkeen printzipio eta obligazioak: batetik, 2016/679 (EB) Erregelamendua, Europako Parlamentuarena eta Kontseiluarena, 2016ko apirilaren 27koa, datu pertsonalen tratamenduari dagokionez pertsona fisikoen babesari eta datu horien zirkulazio askeari buruzko arauak ezartzen dituen eta 95/46/EE Zuzentaraua indargabetzen duena, eta, bestetik, 3/2018 Lege Organikoa, abenduaren 5ekoa, Datu Pertsonalak Babestekoa eta Eskubide Digitalak Bermatzekoa.

2. Esandakoari jarraikiz, hartuko ditu zenbat ere neurri tekniko eta antolakuntzazko behar diren hori betetzen dela ziurtatzeko, eta Bizkaiko Foru Aldundia erantzukizun orotatik salbuetsita geldituko da datuen tratamenduan.

3. Baldin eta entitateak Bizkaiko Foru Aldundiari komunikatu behar badizkio diruz lagundutako jardueretako parte-hartzaileen datuak, orduan Autonomia Pertsonala Sustatzeko Zuzendaritza Nagusiak hartuko du tratamendua egiteko ardura, eta datuak integratu egingo dira «Autonomia pertsonala sustatzea eta mende-kotasun- eta desgaitasun-egoeretarako laguntza ematea» arloaren tratamenduan.

4. Era berean, Araudiaren 13. artikuluan ezarritakoa betez, erakundeak, gainera, diruz lagundutako jardueretan parte hartzen dutenei jakinaraziko die euren datuak Bizkaiko Foru Aldundiari jakinaraziko zaizkiola, beste zorro-zerbitzu batzuekiko bateragarritasuna egiaztatzeko eta gizarte zerbitzuen arreta osoa bermatzeko.



5. Hori guztia albo batera utzi gabe noizbehinka eska daitezkeen datu pertsonalak, dirulaguntza benetan bere xederako erabiltzen dela egiaztatzeko asmoz, dirulaguntzak arautzen dituen araudia betetzeko.



I. ERANSKINA

JARDUEREN ZERREDA, PROGRAMAREN ARABERA**0542 — Kultura- eta garapen-jardueren programa**

Gaitasun fisiko eta intelektualak ahalik eta gehien mantentzea eta parte-hartzaileen etorkizuneko egoeretara egoki egokitzeko beharrezkoak diren trebetasun berriak eskuratzeko laguntzea helburu duten jarduerak biltzen ditu:

- Eguneroko bizitzara egokitutako teknologia berrien tailerrak.
- Telefono mugikorrek eta haririk gabekoak erabiltzeko tailerrak, telebista-aginteak, etab.
- Sare sozialak erabiltzeko tailerrak.
- Linea zuriko etxetresna elektrikoak, gas-galdarak eta abar erabiltzeko tailerrak.
- Eskulan-tailerrak.
- Birziklatze-tailerrak.
- Etxeko ekonomiari, erosketa kontzienteari eta gastuen plangintzari buruzko tailerrak.
- Autoestimua, gizarte-trebetasun eta zahartze positiboko tailerrak.
- Oinarrizko jostuntza ikastaroak.
- Etxeko lanei buruzko ikastaroak alarguntzat.
- Alarguntzako sukaldaritza ikastaroak.
- Mendekotasuna duten pertsonak zaintzeko ikastaroak.
- Brikolajeko eta etxea mantentzeko ikastaroak.
- Korua/koru taldea.
- Antzerki Taldea..
- Marrazketa-, pintura- eta argazkigintza-jarduerak.
- Irakurtzea eta idaztea.
- Oroimena estimulatzea.
- Taichi.
- Pilates.
- Yoga.
- Gorputz-erlaxazioa, mindfulnessa, loaren nahasmenduei aurre egiteko laguntza.
- Gimnasia, agerasia, psikomotritateak.
- Hipopresiboak eta gertu-inkontinentziaren prebentzioa.
- Dantza lineako ikastaroak.
- Aretoko dantza ikastaroak.
- Karibeko dantza ikastaroak.
- Beste ikastaro batzuk.
- Arlo honetako beste jarduerak berritzaile batzuk.

0543 — Jolas-jardueren programa

Aisialdia betetzeko helburu nagusia duten jarduerak biltzen ditu, giro ludiko eta lasaia berdin arteko harremana sustatzen dutenak, parte-hartzaileen harreman-gaitasunak ahalik eta aktiboan mantentzeko daitezkeen:

- Egun bateko txangoak.
- Mendi-ibiliak.
- Txapelketak eta lehiaketak.
- Dantzak.
- Bingoak.



- Jaialdi eta jardunaldi kulturalak.
- Ospakizunak.
- Anaitasuneko otorduak.
- Arlo honetako beste jarduera berritzaile batzuk.

0545 — Elkartasun- eta komunitate-jardueren programa

Komunitatearen edo mendetasun-egoeran edo gizarte-desabantailan dauden kolektibo espezifikoaren aldeko jarduerak hartzen ditu barnean, eta ez du ahaztu behar adinekoaren izaera, ekarpenak, beharrak eta eskubideak ikusarazteko helburua, adinekoen bizi-kalitatea hobetzeko jarduerak egitea helburu dutenak:

- Gestioak egiten laguntzea.
- Mugikortasun-arazoak dituzten pertsonen edo sakabanatutako guneetan daudenei lagun egitea eta elkartearen lokaletara laguntzea.
- Aldizkako bisiten eta bakarrik dauden adinekoei etxean, egoitzetan eta ospitaleetan laguntzeko programa (gutxienez 4 bisita/laguntza urtean zehar).
- Bere gaiak ordenatzeko aholkularitza.
- Gizarte-partaidetzako jarduerak, beste gizarte-erakunde batzuekin koordinatuta.
- Belaunaldien arteko truke-jarduerak: eskolaz kanpokoak ikastetxeetan, ludoteke-tako edo gazteen lokaletako jarduerak, ipuin kontalariak, jolas tradizionalak berreskuratzea, etab.
- Adinekoen elkarteak kudeatzeko ikastaroak.
- Nahi ez den bakardadeari buruzko hitzaldiak.
- Medikazioari eta hura zuzen emateari buruzko hitzaldiak.
- Larrialdi medikoen arretarako hitzaldiak eta ikastaroak eta adinekoentzako lehen laguntzak.
- Adinekoen higiearen garrantziari buruzko hitzaldiak.
- Hitzaldiak, hainbat edukitako hitzaldiak.
- Osasun-baliabideekin koordinatzea, auzoko/udalerriko adinekoen osasuna prebenitzeko eta hobetzeko kanpaina espezifikoak egiteko.
- Gizarte-baliabideekin koordinatzea kanpaina espezifikoak egiteko eta gizarte-egoerak komunikatzeko.
- Gizarte-baliabideei gizarte-problematikako egoerei buruzko informazioa ematea: Diogenes sindromea, abandonuak, zaintzak emateko ezintasuna, tratu txarrak...
- Arlo honetako beste jarduera berritzaile batzuk.